

ALTERA
PERPETVA CRUX
JESU CHRISTI
A FINE VITÆ
USQUE AD
FINEM MVNDI,
IN
PERPETUO ALTARIS
SACRIFICIO:

quod ostenditur idem esse, cum
SACRIFICIO ARÆ CRUCIS.

Interferuntur 40 iconibus

AFFECTVS PII,
ET PROPOSITA.

Consilium scribendi, & usum libelli vide
hîc paginâ versâ.

COLONIÆ,

Apud CONSTANTINUM MÜNICH,
ANNO M. DC. L.

consensu Superiorum, & cum Privilegio S. Cesar. Majest.

ALTERA
PERPETVA CRUX
JESU CHRISTI
A FINE VITÆ
USQUE AD
FINEM MVNDI,
IN
PERPETUO ALTARIS
SACRIFICIO:

quod ostenditur idem esse, cum
SACRIFICIO ARÆ CRUCIS.

Interferuntur 40 iconibus

AFFECTVS PII,
ET PROPOSITA.

Consilium scribendi, & usum libelli vide
hîc paginâ versâ.

COLONIÆ,

Apud CONSTANTINUM MÜNICH,
ANNO M. DC. L.

consensu Superiorum, & cum Privilegio S. Cesar. Majest.

Erudite ac Pie Lector.


Gemina, ut probè nôsti, *Crux perpetua* Christo fuit: una ab *Incarnatione* ad extremum vitæ; de quâ eximius *Interpres* in *Marcum*; *Christus*, inquit, continuo *Agnus occisus*, & jure *Sacrificium* ab utero & instanti sua *Conceptionis* fuit. (a) Quæ res 40 Iconibus explicata, plusquàm quadraginta libellorum millibus diverso idiomate jam vulgata, & prælo non intermisso vulgatur in dies.

Ad novæ pietatis illecebras, altera *Perpetua! Crux* & sine vita ejusdem ad finem mundi, in perpetuo *Altaris Sacrificio*, modò proponitur, intermixtis inter imagines *Affectibus*, piisque *propositis*.

Argumentum est non tantùm vicinum, ac cognatum *Sacrificio Ara Crucis*; sed propè idem, tam representatione, quàm reipsâ: tam effectu, quàm affectu. Cavit insuper, pridè quàm pateretur, legitimo testamento *Servator*, ut hoc ipsum foret illius perenne monumentum; *Hoc facite*, ait, *in meam commemorationem*. (b) Retineo iconas easdem; quia earum mysteria, quæ olim mortalis, cunctisque conspicuus peregit, ipsi jam *immortali & invisibili*, (c) æquè tamen ac tum corpore, animoque præsentì, inter *Sacrorum solennia* annuo cursu exhibentur.

Uti esse poterit hæc nova exercitatio tempore *Sacrificii Missæ*, visitationis *Venerab. Sacramenti*, ac *Laudum*: item ante, & à *Communione*, & tempore *Meditationis*, atque alterius cujusque pietatis.

- (a) *Venerab. Angelus Del Pas Comment. in Marci cap. 10.* (c) *1. Corinth. II.*
(c) *1. Tjmoth. I.*



CAPVT PRIMVM.

A fine vitæ Christi , usque ad finem mundi
 PERPETUUM ALTARIS
 SACRIFICIUM
 CUM SACRIFICIO ARÆ CRUCIS
idem est in representando.



Mnibus in confesso est, myste-
 rium sacrosanctæ Passionis,
 ac Crucis, in divino Sacrificio
 Missæ variè exhiberi.

In primis in Sacerdotum sa-
 cris vestibus, capitis tegumêto
 siue Amictu, Albâ, Cingulo, Stolâ, Manipulo,
 Casulâ, (cui Colûna & Crux insertæ) & verti-
 cis Coronâ exprimitur Servatoris Velum, quo
 oculi obducti; candida Vestis, quâ illusus; va-
 ria Vincula, quibus colligatus; coccinea Tu-
 nica, quâ indutus; Columna, ad quam cæsus;
 Crux, cui affixus; spineum Sertum, quo redi-
 mitus fuit.

Insuper omnis Ara Cruce signata est; Cru-
 cifixus omni Altari impositus; Purificatoria,
 ut vocant, ac Corporalia in quatuor suis an-
 gulis Cruce notata; majores Hostiæ omnes
 Crucifixi imaginem referunt.

Adhæc, in universâ actione Liturgicâ My-
stes ritu multiplici Christum imitatus nunc
expansis, nunc junctis manibus; modo de-
pressis, modò oculis sublevatis; modò stans,
modò flectens; modò incurvus, modò ere-
ctus Deum precatur. Hostia autem adoran-
da, Calixque in sublime terram inter ac cœ-
lum attollitur; varia Crux ante, & post ri-
tè formatur; toto Sacrificio diversi gene-
ris, atque arcanæ significationis ceremoniæ
ubique intermiscuntur: per quæ omnia, Pas-
sionis memoria luculentis planè signis, ac
symbolis inculcatur.

Deinde (quod universi Theologi in hoc
argumento potissimum attendunt & æsti-
mant) quantum est ex ipsâ vi verborum
Sacerdotis sacrificantis, & mortuarum si-
mulacro specierum, augustissimum Christi
corpus, quasi ex sanguine, atque ex anime; san-
guis autem, velut effusus, inter se quodam mo-
dò separantur, ac seorsim ponuntur; adeoque
sic Christus in Crucem actus, ac mortuus re-
præsentatur.

Denique accedit subactum, - pistumque
panem (cujus hîc residuæ sunt species) ac
tritum flagello excussum, molâque con-
tritum, exhibere eum qui *attritus est propter
scelera nostra.* (a) Vinum verò illud hîc pro-
pinatur, de quo tamquam in torculari sup-
plici-

(a) *Isai. 33.*

pliciorum calcato, duréque presso, dilecta nescio quæ, amoribus ebria exclamat: *Botrus Cypri Dilectus meus mihi, in vineis, (a) in vindemiis, in torcularibus. Ecce repræsentatio.*

(a) *Cant. I.*

CAPUT SECUNDUM.

Non tantum idem est representatione; sed etiam re ipsâ.

OEcumenica Tridentina Synodus ita disertis loquitur verbis: *Si quis dixerit Missæ Sacrificium, tantum esse nudam commemorationem Sacrificii in Cruce peracti, anathema sit. (a)* Potest omnino aliquid esse commemoratio, sive imago rei alicujus, & nihilominus simul res ipsa.

Eam veritatem *Jacobus Lainius* Theologus Pontificius, ac Societatis Jesu secundus Generalis non minùs ingeniosâ, quàm populari similitudine omnibus intellectu facilem reddidit, in confesso *Poissiano*, anno à Virginis partu sexagesimo primo supra millesimum quingentesimum, audientibus primariis regni Gallici Proceribus, atque Principibus.

A 3

Fac.

(a) *Seff. 22. can. 9.*

Fac, ait, Regem, qui præclaram ex hoste victoriam reportârit, victoriæ ejus memoriam quotannis instaurari velle: id triplici viâ proclive erit facere. Primùm, si narrari tantummodò seriem rei gestæ jusserit: deinde, si per Actores simulacrum ipsum belli referri: postremò, si ipsèmet inter Actores adesse velit, quàmque in pugnâ olim subiit, eam postea in imitatione, & representatione idem ipse personam subierit. Hanc enim cum verâ Regis præsentia veram imaginem, verâque representationem haud dubiè fore perspicuum est: idque nunc in divinissimo, & incruento Missæ Sacrificio fieri, assererat. (a)

Apta ratiocinatio, quæ rem nostram ita illustrat, ut oculis subjicere videatur. Et enim Tridentinum agens de hoc Altaris mysterio, ait ejusmodi esse, quo mortis ejus (videlicet Redemptoris) victoriæ & triumphus representatur. (b) Et alibi: Una eadèmq; est hostia, inquit; idem nunc offerens Sacerdotum ministerio, qui seipsum tunc in Cruce obtulit,
solâ

(a) *Histor. Socjet. p.2. lib.5.n.199. & 205.*

(b) *Sess. 13. cap 5.*

solâ offerendi ratione diversâ. (a) Sed in quo sita est illa discriminis ratio? Eodem illo loco docet hoc apertè Sancta Synodus: *In hoc, inquit, divino Sacrificio incruentè immolatur, qui in Ara Crucis semel seipsum cruentè obtulit.* Quid ad sanam doctrinam verius, quid ad veritatem manifestandam clarius, quid ad claritatem propositæ rei, vel brevius, vel accommodatius dici potuit?

Liquidò ergò patet, *Sacrificium Altaris*, cum *Sacrificio Ara Crucis* non tantum in commemorando, & repræsentando, verum etiam idem esse in essendo, prout Scholæ loquuntur.

(a) Sess. 22. cap. 2.

¶ (:0:) ¶



CAPUT TERTIUM.

Idem deinde est in effectu.

TAmetsi varii, juxta Tridentinum, *Oblationis cruenta fructus*, per hanc incruentam *uberrimè percipiantur*; (a) aliis prætermiſſis in primum, & ab Orbe perduto maximè expetitum, & à Deo obrentum fructum oculos conjicio, qui est, remiſſio peccatorum. Porro in priori Sacrificio CHRISTUS ipſe eſt propitiatio pro peccatis noſtris, non pro noſtris autem tantum, ſed etiam pro totius mundi. (b) Et idem Apoſtolus alio loco: *lavit nos à peccatis noſtris in ſanguine ſuo*. (c) Pariter in poſteriori Sacrificio quotidie dicitur: *Hic eſt Calix ſanguinis mei, qui pro vobis, & pro multis effundetur in remiſſionem peccatorum*. (d) Ut verò de hoc tam deſiderato fructu ſecuri ſimus; docet ſancta Synodus, *Sacrificium iſtud verè propitiatorium eſſe*. (e) Et paulò poſt ſubjungit: *Hujus quippe oblatione placatus Dominus, gratiam & donum poenitentia concedens, crimina, & peccata etiam ingentia dimittit*. Neque ingentia tantum, ſed è numero plurima. Tanta virtus eſt immaculatæ iſtius hoſtiæ; cujus inſuper vis non modò viventibus prodeſt, ſed ſeſe

exten-

(a) *Seſſ. 22. cap. 2.* (b) *1. Joann. 2.* (c) *Apoc. 1.* (d) *in Canone Miſſæ,* (e) *Trident. Seſſ. 22. cap. 2.*

extendit ad mortuos, ut èt illi suo modo à peccatis solvantur. (a)

Unde Patrem æternum quisque Sacerdos, quotidie suo, omniumque nomine (dum ad Aras facit) ita confidenter alloquitur: *Suscipe, Sancte Pater, omnipotens æterne Deus, hanc immaculatam hostiam, quam ego indignus famulus tuus offero tibi Deo meo vivo & vero; pro innumerabilibus peccatis, & offensionibus, & negligentis meis, & pro omnibus circumstantibus, sed èt pro omnibus fidelibus Christianis vivis atque defunctis; ut mihi & illis proficiat ad salutem in vitam æternam.* (b) Amen.

Evigila igitur, & exsurge in spem ingentem, quæcumque es grandibus pressa malis, atque ingentibus vulnerata criminibus, peccatrix anima. Licet exclames cum Rege facinoroso: *Peccavi super numerum arena maris; multiplicata sunt iniquitates meae Domine, multiplicata sunt iniquitates meae;* (c) nihilo-minus accede omni tergiversatione metuique discusso, ad expiatrix, & placabilem Aram hanc, & prout decet, hanc victimam immola, vel immolanti assiste; ac miserebitur tui Deus: secundum magnam misericordiam suam, &

A 4

secun-

(a) 2. Mach. 12. (b) in Missæ Officio.

(c) in Orat. Manassæ.

secundum multitudinem miserationum suarum delebit iniquitates tuas.

CAPUT QUARTUM.

Idem denique est in affectu.

Immensi prodigium amoris est Christus in Cruce;

*Divina cujus Charitas
Sacrum propinat Sanguinem;
Almique membra corporis
Amor Sacerdos immolat. (a)*

Enimverò quæ tum fuit *Charitas*, *nunquam excidit*; (b) sed in Sacrificio Eucharistico eadem manet: cum sit idem offerens; & idem cui offertur; & idem quod offertur; & idem pro quibus offertur; pro quibus paratissimus est Christus etiam modò, si ita expediret, in vincula, in flagra, in spinas, in clavos, in crucem, in mortem ire. In utroque tamen Sacrificio discrimen est, fateor, quoad rationem offerendi diversam: verum ea disparitas, hic quàm stupendo, multiplicique amore suppletur!

Primò. Credimus in Cruce peractam oblationem

(a) *In Horis Canon. Sabbat. in Albis.*

(b) *I. Cor. 13.*

lationem corporis JESU CHRISTI semel. (a) Hic autem Sacerdos sibi ipsi perenni victimæ superest, & victima Sacerdoti: ubi CHRISTUS semper mysticè moritur, ac re ipsâ semper vivit, non tantum ad interpellandum, sed etiam sacrificandum pro nobis. Hæc enim victima, inquit *S. Gregorius, (b)* nobis unigeniti mortem per mysterium reparat: qui licet resurgens jam non moritur, tamen in semetipso vivens, pro nobis iterum in hoc mysterio immolatur.

Hoc nimirum est, quod unus ex primis Ecclesiæ Principibus B. ANDREAS Apostolus olim apud Ægæam Proconsulem est professus. Ego omnipotenti Deo, inquit, qui unus & verus est, immolo quotidie non taurorum carnes, aut hircorum sanguinem, sed immaculatum Agnum in Altari: cujus carnem posteaquam omnis populus credentium manducaverit, Agnus qui sacrificatus est, integer perseverat ac vivus. (c)

Secundò. Sacrificium postremæ Crucis uno in monte celebratum, & trium horarum spatio perfectum fuit. De hoc autem nostro,

A 6

jux-

(a) *Heb. 10.* (b) *Lib. 4. Dial. cap. 58.*

(c) *In Horis Canonicis Festi.*

iuxta legitimam interpretationem Ecclesiæ, (a) prænuntiatum à Vate Malachiæ: (b) *Ab ortu usque ad occasum, magnum est nomen meum in gentibus; & in omni loco sacrificatur, & offertur nomini meo oblatio munda.* Neque omnibus locis tantum, sed et horis. Siquidem, ut de aliis Religiosorum hominum cœtibus nihil dicam, Societas JESU variis distincta domiciliis totum terrarum orbem complexa, sic divinis rebus vacat, ut nulla sit hora, nullum diei, noctisque spatium, quo non Sanctissimum Missæ Sacrificium offerat Deo. Hanc rem accuratè demonstrat tabula Geographica ante aliquot annos in Germaniâ luci data, quæ diversas orbes totius ad Orientem, ad Occidentem, ad Meridiem, ad Septentrionem Societatis Provincias, sedesque designat. (a).

Tertiò. Ibi post oblatam cruentam in Cruce victimam, corpus CHRISTI exanime marmoreo sepulcro illatum fuit: hîc post incruentam oblationem se omnino vivum reliquit sub amabili Sacramento. At quàm amabili? Edisserat Tridentinum: *Salvator noster, inquit, Sacramentum hoc instituit, in quo divitias divini sui erga homines amoris velut effu-*

(a) *Trident. Sess. 22. cap. 1.* (b) *Cap. 1.*

(c) *Joann. Bourgesius de Jubil. Societat. cap. 21.*

effudit. (a) Augustissimum enim corpus, beatissimam animam, infinitam divinitatem, merita universa liberalissimè nobis impertiit; & quidem modo supra omnem modum admirando, omnibùsque ætatibus inaudito. Sub sensibilibus namque speciebus spirituali modu voluit collocari, & ingenti dignatione in punctum veluti transire, ac propè liquefcere; ut tanta substantia nostræ infirmitati apta esset, & nobis quasi, infantibus quodammodò, ut loquitur *Augustinus*, divina hæc mensa lactesceret. Quid amabilius esse potest, hominique optabilius, quàm divinum CHRISTI corpus in punctum redigi, ut sese intimè nobis possit conjungere; nos totos pervadere, sanctificare, divinos reddere?

Neque verò hoc ipsum tam amabili bonitati satis fuit. Etenim non semel tantum iterùmque se in qualibet hac refectione, verum etiam innumeris vicibus præsentem tradidit; ut vel hinc intelligamus, quàm amicâ, benevolâque liberalitate divina sua dona in nos profunderè, & quàm multipliciter se nobis unire desideret, imò se totum dare, ac millies dare.

Quartò. A Crucis Sacrificio redivivum corpus ac gloriosum, diverso sub schemate,

A 7

habi-

(b) *Sess. 13. cap. 2.*

habitúque sese per intervalla spectabile variis mortalibus præbuit. Non dissimilem amoris ludum , scenámque idem numero corpus gloriosum , sub niveo specierum sacramentalium involucro , quasi post siparium latens, non rarò exhibet.

Ut veteres historias fíleam , nostræ commemorant *Scalabisci* in Lusitania servari, magnâque religione coli admirabilem quamdam Hostiam , quæ uno eodémque tempore varias CHRISTI imagines intuentium oculis repræsentat. Hisce *Pastoris, Sponsi, Regis* simulacrum ostendit: istis in *Horto sudantis, flagella patientis, spinis coronati* personam objicit. Quid porrò? Ab aliis *recens nati, resurgentis, in cælos ascendentis*, denique *judicantis* spectatur effigies. (a)

Frúere èt tu , quisquis es, prodigiosâ non tantùm , sed prodigâ, nimíaque hac charitate benignissimi tui Jesu.

Accede ad eum Fide vivâ , Spe firmâ, Charitate ferventi. Séquere *Pastorem* , venerare *Regem*, ampléctere tuum *Sponsum*. Quid verêris? pro te *sanguinem* ille sudavit: cruenta *flagra* perpeßus: *spinis* circumdatus: tibi ille *vatus*: tibi *mortuus*: tibi *resurrexit*: tibi ille locum

(a) *Euseb. Nierember. de mirac. Europa. lib. I. cap. 15.*

cum paravit in *cœlis*. Tuus denique *Judex* venturus, ac benignè dicturus: Veni benedictæ Patris mei, posside Regnum tibi paratum à constitutione mundi; à cujus *origine* *Agnus* pro te occisus (a) in tot præviis figuris ac symbolis; deinde reipsâ in monte Calvariæ: ac denique quotidie in Altari Eucharistico immolatur, & *usque ad finem mundi* perpetuò immolandus.

(a) *Apoc. 13.*



Affectus pii, & Proposita.

O Abyssus bonitatis, tantane res erat salus peccatricis animæ meæ, ut ei expiandæ tantum Sacrificium ab æterno destinaret? Adeone non taurorum, ac vitulorum sanguine; non corruptibilibus auro, vel argento redemptus sum, sed tui ipsius pretioso sanguine, quasi Agni immaculari, de quo mihi toties dicitur: *Ecce Agnus Dei, ecce qui tollit peccata mundi*; qui jam quotidie in Arâ Eucharisticâ immolatur?

Amabiliissimam hanc charitatem tuam, ô mi Jesu, admiror & veneror: æstimo & laudo: magnifico & benedico quantum possum: neque possum, quantum volo: neque velle valeo quantum debeo.

Quid igitur? Quoties respiro, toties suspiro, atque desidero totis medullis cordium amare te: amare te cordibus omnium hominum, & Angelorum: ac die noctûque clamare cum omni creaturâ quæ in cœlo est, & in terrâ:

Dignus est Agnus, quem in venerabili Arâ præsentem credo, & adoro: Dignus est Agnus accipere virtutem, & divinitatem, & sapientiam, & fortitudinem, & honorem, & gloriam, & benedictionem. Amen.

1. Ab æterno destinatum Sacrificium Crucis & Altaris.



In libro vitæ Agni, qui occisus est
ab origine mundi. *Apoc. 13. v. 8.*

Affe-

Affectus pii, & Proposita.

Firmissimâ fide credo, ô Pater æterne, vetera Sacrificia, neque ex parte offerentis te penitus placare; neque ex parte rei oblatae tibi placere potuisse. Unde unigenitus tuus, in quo tibi bene complacitum est, sese in novam victimam pro peccatis nostris offerens, cum flagranti desiderio subeundæ Crucis descendit de cœlis, ac jamtum dixit; *Ecce venio.*

Jam tum paratus eras, ô amantissime Jesu, amore amoris mei in manus hostium venire, vinculis constringi, opprobriis lacerari, flagris concideri, spinis coronari, ad mortem rapi, clavis in Cruce configi. Etiam nunc tibi in Altari Eucharistico, quasi recens incarnato, mens eadem, idem studium, idem ardor, si necesse foret, mei amore mori.

O Amor meus, quid retribuam tam stupendo affectui tuo? Voluntariè sacrificabo tibi hostiam laudis, & obsequii in hoc N. & illo N. ex toto corde meo, affectuque rerum omnium creaturarum, quæ umquam fuerunt, sunt, & erunt. Omni momento expeditus, dicam tecum: *Ecce venio. Amen.*

2. Incarnatio.



Holocaustomata pro peccato
non tibi placuerunt: tunc dixi;
Ecce venio. *Heb. 10. v. 6.*

Affectus pii, & Proposita.

POsito diademate , ac sceptro divinitatis
 unigenitus DEI ante sæcula genitus , pro
 homine sis filius hominis, in tempore nã-
 sceris, in stabulo reclinaris? Quod natura hîc
 non habet, usus nescit, ignorat ratio, mens
 non capit, pavet cœlum, stupet terra, hoc ego
 credo, hoc adoro, hoc glorifico, hoc confite-
 or, hoc amplector.

O divinitas tremenda ! ô humanitas aman-
 da ! ô Deus ! ô homo ! Ibi magnus in cœlis es, &
 hîc parvus in terris: ibi regis sidera, hîc sugis
 ubera ! ibi tonas in nubibus, hîc vagis in pan-
 nis : ibi sedes inter Angelos , hîc jaces inter
 bestias: ibi dives in throno, hîc pauper in fœ-
 no. Cæterùm quàm ibi olim præsens in stabu-
 lo, tam hîc in Templo; quàm certò ibi in bra-
 chiis S. Joseph , tam hîc in manibus Sacerdo-
 tis ; quàm verè ibi materno exceptus es gre-
 mio, tam hîc ore linguâque fidelium : ô si pari
 reverentiâ , & amore ! Utrumque hoc imitari
 pro viribus conabor, ope tuâ frētus, ô Virgo-
 Mater ! Amen.

3. Nativitas.



Propter vos egenus factus est,
cum esset dives. 2. Cor. 8. v. 9.

Aff-

Affectus pii, & Proposita.

AN ignoro, unde sit mihi excitandus dolor, & timor unde? Utique ex consideratione remedii, periculi mei æstimo gravitatē. Sanus mihi videbar, & ecce mittitur filius Dei altissimi, & pro me jubetur jam circumcidi, & postea occidi: ut vulneribus meis pretioso sanguinis balsamo medeatur.

Agnosce, ô anima mea, quàm gravia sint vulnera, pro quibus necesse est huac divinum infantulum vulnerari. Si non essent hæc ad mortem, & mortem sempiternam, numquam pro eorum remedio Dei filius jam circumcideretur, & postea moreretur. Quid ad hæc, ô anima mea?

Parce, ô Domine, parce seriò pœnitenti: in cuius rei argumentum circumcidere deinceps statuo quidquid meum est; intellectum, ne nimium sapiat: voluntatem, ne illicita cupiat: memoriam, ne noxia reminiscatur: oculos, ne vana videant: aures, ne prava percipiant: linguam, ne perversa loquatur: totum corpus, ne ullâ minùs decenti voluptate capiatur.

Ita fiat, mi optime Jesu, idque obtestor per illum ipsum cruorem, quem tum fudisti, quique reliquo conjunctus sanguini in sacris nostris Altaribus adest. Amen.

4. Circumcisio.



Consummati sunt dies octo, ut
circumcideretur puer. *Luc. 2. v. 21.*

Affe-

Affectus pii, & Proposita.

QUàm sancta, quàm nobilis hæc oblatio! Si considero offerentem, est justus Simeon, est Virgo-Mater, est ipsemet Christus. Si contemplor oblatum, offertur Prophetæ vita, in pace finienda; offertur cor Virginis, in quâ plenitudo gratiarum; offertur cor Christi, in quo omnes thesauri divinitatis inclusi. Si attendo affectum, magnus est Simeonis, major MARIÆ, maximus JESU. Si finem intueor, est omnium mortalium salus. Quàm sancta, quàm nobilis hæc oblatio!

Quid intereà ego? In simplicitate cordis mei lætus offero universâ; & sic universa, ut ne pilum vnum, vel unguam hujus victimæ sibi Dæmon, Mundus, Caro retineat. Dispone de me, Deus meus, de bonis fortunæ, corporis, animæ; dispone de me toto & in tempore, & æternitate.

Offero hoc meum holocaustum in unione oblationis, quam in primo in orbem introitu, primòque in templum ingressu; deinde per omnem vitam; denique in ultima cœna ac monte Calvariæ obtulisti, & etiamnum in sacro-sanctæ Missæ Sacrificio offers. Custodi hanc voluntatem meam, Deus meus; quam quotidie tecum custodire decerno. Amen.

s. Oblatio in Templo.



Tulerunt eum in Hierusalem,
et sifterent eum Domino. *Luc. 2.*
vers. 22.

Affectus pii, & Proposita.

Non tantum olim in Bethleemo, sed nunc
ubique gentium, furor, gladius, cædes;
fuga, gemitus, comploratio. Quid dicam, ô
magne Exercituum Deus?

Peccati poenam sentimus, & peccandi con-
suetudinem non mutamus. Vita in dolore
suspirat, & in opere se non emendat. Si expe-
ctas, non corrigimur; si vindicas, murmura-
mus. Si extenderis manum, facienda promit-
timus; si suspenderis gladium, promissa non
facimus. Si feris, clamamus ut parcas; si parcis,
provocamus ut ferias.

Habes, Domine, confitentes reos. Gravius
est quod commisimus; levius quod tolera-
mus. Justus es Domine, & rectum iudicium
tuum!

Verum, quia posuisti divinam mensam ad-
versus eos qui tribulant nos; & nôsti quid sit
persecutio, gladius, fuga, dolor, & lacrymæ, ad
te clamamus gementes, & flentes; & millies
cum rotâ Ecclesiâ iteramus, dum *bella pre-
munt hostilia, da robur, fer auxilium*: idémque
auxilium præsta, ut quisque peccata, bellorum
causas, & ego hæc N. N. mea devitem. A-
men.

6. Fugain Ægyptum.



Surge, & accipe puerum, &
matrem eius, & fuge in Ægyptū.
Matt. 2. v. 13.

Affectus pii, & Proposita.

QUamdiu gemens clamabo, ubi es Deus meus? Te quæro foris, & intus, & sursum, & deorsum; nec usquam invenio, qui tamen ubique es.

Siquidem tenes omnia, imples omnia, complêcteris omnia, superexcedis omnia, sustines omnia. Undique omnia circumplêctendo imples, implendo circumplêcteris, sustinendo superexcedis, superexcedendo sustines; sursum regens, deorsum sustinens; extra circumdans, interiùs penetrans.

Nihilo-minùs te mihi præsentem quæro; apud me stantem insequor, me intuenti dico; cur avertis faciem tuam à me? Quæ monstra sunt ista?

Verùm non ago de præsentì omnibus substantiâ tuâ, sed de propitiâ mihi gratiâ tuâ, de auxilio tuo, de affectu tuo, de amplexu tuo; quem sæpè expertus sum, præsertim cùm te reperi in *Templo* & *Altari* isto, & iterum, spero, reperiam. Tunc dicam ex totis præcordiis meis: jam quem quæsi teneo, non dimittam, propter ista N. vel illa solatiola humana, non dimittam, Amen.

7. Amissio pueri duodennis.



Ecce pater tuus & ego dolentes
quærebamus te. *Luc. 2. v. 48.*

Affectus pii, & Proposita.

Filii primi Adæ, cui dictum fuit: in sudore vultûs tui vescêris pane tuo; filii Adæ, quid statis totâ die otiosi? quid tempus vestrum nugando, ludendo, epulando, (non audeo dicere plura) consumitis?

Responderis; ita vos vivere, ut transeat tempus. Itâne verò ut transeat tempus, quod vobis ad salvandam animam; ad agendam pœnitentiam; ad obtinendam veniam; ad acquirendam gratiam; ad gloriam promerendam miseratio Conditoris indulget?

Filii secundi Adæ, quid statis totâ die otiosi? cùm ille Filius Dei altissimi; ille qui fabricatus est auroram, & solem; ille tantus ac talis, fabili labore triginta propè annos expleverit?

O mi Domine, quid etiamnum ubique operaris mira & magna, non tantùm transmutando panem vinûmque in corpus & sanguinem tuum: sed ingentia dona, per idem Sacramentum, animabus fidelium conferendo; da mihi, quod maximè volo optoque, *operari non cibum qui perit, sed qui permanet in vitam æternam*; operari salutem meam in isto N. & isto N. Amen.

8. Labor fabrilis.



Nónne hic est faber filius Ma-
riæ? *Marci 6. v. 3.*

Affectus pii, & Proposita.

EXtremum vale, inquit *S. Josephus*, ô benedicta inter mulieres, sponsa mea dilectissima, cujus castissimis amoribus semper arsit cor meum, & nunc iisdem liquefiunt intima viscera animæ meæ.

Extremum vale, ô benedictæ Domini, ô amantissime fili mi *Jesu*, decore nimis & amabilis super amorem hominum, & Angelorum. Sicut mater unicum amat filium suum, ita ego te dilexi; cujus suavissimo conspectu semper satiatus fui, ampliusque satiabor, cum apparuerit gloria tua.

O me nimium felicem, quod mihi tot annis datum inter duo hæc divini amoris incendia flagrare! & jam, spero, dabitur penitus conflagrare.

O si moriatur anima mea morte justæ istius, & fiant novissima mea hujus similia! O *Maria*, sponsa *S. Josephi*, adsis sic mihi in hora mortis meæ! O *Jesu*, alumne *S. Josephi*, dum in extremo vitæ meæ dignaberis è Templo venire ad me, & sacro Viatico munire me; ne permittas me separari à te: in hora mortis meæ voca me; ut amem te in sæcula sæculorum. Amen.

9. Mors S. Iosephi.



Adfuit morienti JESUS & Ma-
ria, teste *Bernard. Senens. Tom. 3. a.*
2. c. 3 pag. 462.

Affectus pii, & Proposita.

Clementissime mi Jesu, qui Diabolum ad te accedentem non rejecisti; me, licet conspectu tuo indignissimum, sub aspectum tuum venire permitte. Ausus est ille nequiter dicere: *Si filius Dei es, dic ut lapides isti, panes fiant*; in simplicitate cordis mei audeo ego dicere: cum filius Dei sis, dic ut panes isti, quos in Sacerdotum manibus intueor, divinissimum corpus tuum fiant.

Quia semel cœpi, loquar ad Dominum meum, cum sim pulvis & cinis. Cum per verba Ministrorum tuorum, tuâ virtute divinitus operante, confectum esse certissimè credam beatissimum corpus tuum, animâ, & divinitate comitantibus; tu lôquere, Domine, & dic animæ meæ: Salus tua ego sum. Ego verò quoties te accedam, ingenti fiduciâ dicam: Anima Christi sanctifica me: corpus Christi, salva me: sanguis Christi, inebria me: aqua lateris Christi, lava me: passio Christi, conforta me: ô bone Jesu, exaudi me: intra Vulnera tua absconde me: ab hoste maligno defende me, Amen.

10. Tentatio Diaboli.



Accedens tentator dixit ei ; Si
filius Dei es, dic ut lapides isti pa-
nes fiant. *Matth. 4. v. 3.*

Affectus pii, & Proposita.

Obstupescite cœli super hoc, & portæ ejus desolamini vehementer! Duo enim mala fecit anima mea: te Deum dereliquit fontem aquæ vivæ, & fodit sibi cisternas, cisternas dissipatas, quæ continere non valent aquas.

Hei mihi! quàm desipui in sectandis his N. vel illis N. mundi bonis! Siquidem in te possideo bona vera, cùm alia cuncta sint falsa: bona pura, cùm alia sint felle permixta: bona ad manum parata, cùm alia sint procul quærenda: bona perennia, cùm alia sint caduca. Verè omnis qui bibit ex aquis his, sitiet iterum; qui autem biberit ex aquâ quam mihi dabis, non sitiet in æternum,

Domine, da mihi, obsecro, hanc aquam; ut non sitiam ampliùs: da mihi te ipsum, ad què desiderat anima mea, sicut desiderat cervus ad fontes aquarum! Desidero te millies, mi Jesu, quando venies? Veni Domine, tu solus. deliciæ meæ, fiducia mea, gaudium meum, tranquillitas mea, suavitas mea, protectio mea, possessio mea, thesaurus meus, Deus meus, & omnia. Amen.

II. Fatigatio ad fontem.



Qui biberit ex aquâ, quam ego
dabo ei, non sitiet in æternum.

Joan. 4. v. 13.

Affectus pii, & Proposita.

Non tantum à Judæis olim, ô mitissime Domine, passus es opprobrium, & contemptum; sed etiamnum ab ethnicis, ab hæreticis, ab impiis Christianis quid non injuriæ pateris? Illi à fide alieni venerabiles Aras tuas irrident: insuper isti perfidè destruunt: horum non pauci sacrilegè accedunt.

Pro omnibus istis contumeliis, & indignissimis criminibus, ego omnium tuorum infimus, usq; ad abyssum nihili prostratus, flecto genu cordis mei, & cum omnibus creaturis, quæ in mundis infinitis creari possent, te honoro, te laudo, te magnifico, te extollo, te adoro, te amo.

Te præsentem, (audi Orbis universe) te æquè præsentem in Templis, in Aris, in Sacerdotum manibus esse credo, atquè præsens es ad dexteram tui Patris in cœlis. In hac orthodoxâ fide vivo, eamque vitâ & sanguine figillare paratus, etiam hoc momento, opitulante tuâ gratiâ. In hac fide vivâ memorituum esse confido, teque propitio ad dexteram tuam auditurum: *Fides tuâ te salvum fecit.* Amen.

12. Irrisio.



Nónne bene dicimus nos; quia
Samaritanus es tu, & dæmonium
habes? Joan. 8. v. 48.

Affectus pii, & Proposita.

STupenda res, horrenda res, ex mero odio, caput humanum in disco, spectandum Principibus, tempore convivii inferri.

Amanda res, miranda res, ex purâ charitate, non humanum, sed divinum, non caput tantum, sed et humeros ac brachia; cor & pectus; manus ac pedes, totumque corpus, non præcursoris Christi, sed Christi; non modò spectandum, sed epulandum; non tantum Principibus, sed omni hominum generis; non unâ vice, sed innumeris apponi.

O charum caput, & facies in quam desiderant Angeli prospicere! Beata brachia & humeri, qui Crucem pro me ferre dignati! Benedictum pectus, in quo dilectus tuus discipulus recubuit! O cor amabile, omni peccatori pervium! O venerabiles manus, in quas acceptus est panis, & benedictus, & fractus, datûsque Discipulis! O benigni pedes, peccatricis lacrymis irrigati! O sacrum Corpus, cujus solius amore semper languere desidero, illud semper suspirare, semper esurire, ejusque dulcedine semper pasci. Amen.

13. Decollatio Baptistæ.



Decollavit eum in carcere, &
attulit caput ejus in disco, & de-
dit puellæ. *Marc. 6. v. 28.*

Affectus pii, & Proposita.

Hilapides loquuntur, & clamant, id quod Petrus fundamentalis Ecclesiæ petra: *Tu es Christus filius Dei vivi.* Vident enim te per dotem corporis gloriosi, per dotem *impassibilitatis* inter lapidantes attonitos incolumem, illæsumque transire. Ita te pariter filium Dei lapis tuus sepulchralis, propter dotem *subtilitatis*, in tuâ Resurrectione cognovit.

Pater æterne, tibi, cum omni curiâ tuâ cœlesti, gratias ago; quia hoc novo prodigio clarificas filium tuum, adversariis ejus omnino confusis.

Sancti autem tui omnes benedicant te, **CHRISTE**, tum quia nostri amore subducis minori, ut te reserves ad graviora supplicia; tum quia nos doces nullum ulli nocere posse, sine providentiâ tuâ.

O mi Domine, qui in Altari nostro præsentissimus es, & dixisti te nobiscum fore usque ad cōsummationem sæculi; adsis mihi, saltē gratiâ tuâ, in omnibus viis, & periculis meis; & dicam confidenter: Non timebo mala, quoniam tu mecum es; nec offendam ad lapidem, pedem meum. Amen.

14. Lapidatio.



Sustulerunt ergò lapides Judæi, ut lapidarent eum. *Joan. 10. vers. 32.*

Affectus pii, & Proposita.

HEi mihi! quot olim de altitudine montium cecidère, quot præcipitantur in dies! Quomodò cecidisti cum tuis de cælo Lucifer, qui dicebas in corde tuo: sedebo in monte testamenti, in lateribus Aquilonis? Ita ascendit in altum superbus homo, audiens illud, *eritis sicut Dii*, & lapsus ex alto comparatus est jumentis insipientibus, & similis factus est illis.

Ah! non veniat mihi pes ille superbiæ; non exaltetur cor meum; neque ambulem in magnis, neque in mirabilibus super me!

Hoc oro te, humillime Jesu, per inustam tibi injuriam, dum vi factâ irruentes in te, urbèque tuâ te pellentes, ad cacumen montis traxerunt, ut inde te præcipitem darent. Idipsum obtestor per omne opprobriû, quod in monte Calvariæ pro me passus es; pèrque innumeras contumelias, & probra, quæ vides & toleras in montibus Sion, id est, templis tuis. Ex his enim violentè exturbaris; in istis conculcaris; in aliis ludibrio afficeris ab impiis: utinam à piis, & nominatim à me, omni pietatis genere colaris! Amen.



Ejecerunt illum extra civita-
tem, & duxerunt illum usque ad
supercilium montis; ut præcipi-
tarent eum. *Luc. 4. v. 29.* Affe-

Affectus pii, & Proposita.

QUò vadit Dilectus tuus, ô Noëmi, ô pulcherrima mulierum, quò vadit? Ad cœnam, cui intererit proditor; ad hortum, ubi sudabit sanguinem; ad Annam, ubi alapis cruentabitur; ad Caipham, ubi opprobriis saturabitur; ad Herodem, ubi illudetur ut demens; ad Prætorium, ubi cædetur ut reus; ad montem, ubi suspendetur ut latro. Hæc singula confers in corde tuo, & profundè gemens, dicis: *Ne vocetis me Noëmi, id est, pulcram; sed vocate me Mara, id est, amaram: quia amaritudine valdè replevit me omnipotens.*

O Mara ô MARIA, ô mœstissima mulierum,
ô afflictissima virginum !

*Eja Mater, fons amoris,
Me sentire vim doloris
Fac, ut tecum lugeam.*

*Fac, ut ardeat cor meum
In amando Christum Deum,
Ut sibi complaceam.*

Ut èt tibi complaceam, & utriusque dolore & amore langueat, ardeat, liquefiat anima mea ; præsertim dum accedo sacrosanctum Altare , in quo recolitur memoria Passionis istius. Amen.



Seorsum colloquens cum eâ, &
copiam ei suæ præsentia præbēs,
quam in brevi subtrahendus erat
ab eâ. *S. Bonavent. c. 72. Medit. vitæ
Christi.* Affe-

Affectus pii, & Proposita.

INvitaris ad cœnam, cœnam magnam, ô anima Christiana: noli te excusare, noli. Verè cœna *magna*; quia à Magno Deo, magnâ charitate proposita; *Magna* quia magno prodigio elaborata; in quâ memoriâ fecit mirabilia suorum misericors Dominus. *Magna*; quia magnis ferculis instructa, corpore Christi, animâ Christi, divinitate Christi. *Magna*; quia magni pretii: ubi sunt omnes cœli, terraëque thesauri. *Magna*; quia magnâ arte adornata, ubi tota cœna parvo concluditur frusto, & suum hospitem simul includit. *Magna*; quia magnæ, imò universæ hominum multitudini præparata. *Magna*; quia magnis mysteriis ab omni retro ætate præsignata. *Magna*; quia magnorum largitrix munerum: *qui manducat hunc panem, vivet in æternum.*

Quid superest? ut magnâ præparatione, ac curâ; magnâ contritione, & demissione; magnâ fame, & siti; magnâ fide, ac fiducia; magnâ religione, ac reverentia; magno zelo, ac charitate, hanc mensam velis accedere. Amen.

17. Ultima Cena.



Homo quidam fecit coenam
magnam. *Luc. 14. v. 16.*

Affectus pii, & Proposita.

Domine mi J E S U, doce me orare; orare *suppliciter*, qui animi summâ veneratione & corporis infimâ inclinatione, non modò in genua, sed in faciem, orans procidisti. Orare *ferventer*, qui easdē preces ardenti contentione repetiisti, junctis gemitibus inenarrabilibus. Orare *amanter*, qui clamâsti *Abba pater*, id est, pater, ô mi pater, ut dilectissimus filius, amantissimo patri supplicabūdu. Orare *constanter*, qui orâsti usque ad uberes lacrymas, usque ad virium defectionem, usque ad sudorem sanguineum, usque ad supremam agoniam, Orare cum omni *resignatione*, non obstantibus infinitis difficultatibus: *verumtamen non mea*, inquebas, *voluntas, sed tua fiat.*

Volo quidem Domine; sed non valeo sic orare: ut valeam. oro iterum & millies oro, Domine, doce me orare; idque obtestor per preces tuas tantâ demissione, tanto fervore, tanto amore, tantâ constantiâ, tantâ resignatione pro me effusas; p̄rque placabile illud Altaris Sacrificium, in quo semper vivis ad interpellandum pro nobis. Amen.

CRUCIS & ALTARIS.
18. Hortus Gethsemani.

52



Pater , si vis, transfer calicem
istum à me: verumtamen non
mea voluntas, sed tua fiat. *Luc.*
22. v. 42.

Affectus pii, & Proposita.

Juda, quid agis; Amoris signo vulnus infligis? mellis oblatione venenum propinas? charitatis officio sanguinem fundis? instrumento pacis mortem irrogas?

Juda, quid agis? quò decidisti? de Apostolatu, ad apostasiam; de consortio Angelorum, ad contubernium dæmonum; de primis amicorum, ad ultimos hostium; de sublimi gratiæ solio, ad profundam abyssum damnationis; de participatione augustissimi corporis, ad venditionem ejus divinissimi sanguinis?

Ah! quantum sæpe nequitiae sub fronte blandâ; quantum mali sub larvâ boni tegitur! Id facis, peccatrix anima, dum aliquem blanditiis ad peccandum allicis; dum tuis fraudibus decipis; dum per causam pietatis impietatem velas; dum sacram mensam sacrilegè accedis, non dijudicans corpus Domini.

Exeste proditores, procul à me exeste. Moveat vos divina dulcedo charitatis, & viscera misericordiae Christi; qui pro malevolentia favorem; pro odio amorem; pro morte vitam; pro osculo proditorio innocentem præbet amplexum. Hunc amplexum enixissimè desidero, præsertim in horâ mortis. Amen.

1.9 Osculum Judæ.



Confestim accedens ad JESUM
dixit: Ave Rabbi, & osculatus
est eum. *Matth. 26.v.49.*

Affectus pii, & Proposita.

OMnes de aquis tribulationum ; omnes cum Christo de torrente in viâ bibimus ; & trahimur de malo in malum : tolerandum est. Humores nos inflant ; ardores exsiccant ; escæ gravant ; jejunia macerant ; gaudia dissolvunt , tristitiæ consumunt : tolerandum est. Sollicitudo nos coarctat , incuria dissipat ; divitiæ extollunt , paupertas dejicit ; infirmitas frangit , mors interimit : tolerandum est.

O quando corruptibile hoc induet incorruptionem , & mortale hoc induet immortalitatem ? O quando replebimur ab ubertate domûs Dei , & torrente voluptatis potabimur ? O quando dicetur : jam hyems transiit , imber abiit ; veni de Libano , veni coronaberis , intra in gaudium Domini tui ?

Intereâ , dum tædia vitæ toleranda sunt , in loco hoc peregrinationis meæ , & exilii , pascar Eucharistico mannâ , pane Angelorum , deliciis cœli ; donec aspiret dies æternitatis , & inclinentur umbræ hujus vitæ ; donec videam faciem ad faciem illum , qui modò absconditus. hîc me respicit per cancellos , Amen.



De torrente in viâ bibet. Ps. 109.
De multiplici passione Christi intel-
ligit Hieron. Bernard. Euthym. Theo-
dor. & alii.

Affectus pii, & Proposita.

Quissnam ille est, qui à mancipio, à lapâ
 crudeli cæditur? Numquid non est o-
 mnium innocentissimus? Ergò non plecten-
 dus. Numquid non omnium Dominus? Er-
 gò honorandus. Numquid non omnium Pa-
 ter? Ergò amandus. Numquid non electarum
 Sponsus animarum? Ergò favore dignus.
 Numquid non omnium Judex? Ergò timen-
 dus. Numquid non omnium Deus? Ergò ad-
 orandus. Quî sit igitur, ut innocenti, & Do-
 mino, & Patri, & Sponso, & Judici, & Deo
 verber tam ignominiosum impingatur? O
 cæcitas, ô fatuitas, ô crudelitas nimia!

O mi Christe, pro injuriæ istius repara-
 tione te non jam quidem pro tribunali, sed
 in Altari stantem, omnis innocentia fontem
 esse confiteor: te Dominum veneror; te Pa-
 trem diligo; te animæ meæ Sponsum am-
 plector; te omnium Judicem timeo; te Deum
 vivum ac verum cum omnibus Angelis ado-
 ro: impensè flagitans, hanc unam modò à te
 gratiam consequi, ut omnem injuriam à quo-
 cumque mihi impactam libentissimè tui a-
 more condonem; quod èt nunc ex animo
 facio. Amen.

21. Annas.



Unus assistens ministrorum,
dedit alapam Jesu. Joann. 18. v. 22.

Affectus pii, & Proposita.

ECce quomodò afflictio superaddatur afflictio, dum decora facies sordidis sputis inquinatur; divinæ aures gravibus contumeliis laceffuntur; sereni oculi fædo linceo obteguntur; sacrum caput duris colaphis oneratur.

Sed cui bono hæc ludibria? O peccator, pro superfluo oris, vultusque tui cultu ille conspuitur: pro nimia tuâ aviditate captandæ laudis humanæ subsannatur: pro petulanti oculorum tuorum libertate velatur: pro contumaci capitis tui duritie, ille durè excipitur.

Sed jam ad eundem, quem sub sacramento velatum fide vivâ intueris, accede; omniâque peccata cordato dolore detestans dic illi. Ostende mihi, Domine, faciem tuam, & salvus ero: inclina aurem tuam ad preces meas, ad preces etiam latronis inclinatas: converte oculos tuos ad me, etiam Petro te neganti, non negatos: benignus annue capite tuo, etiam ad tui proditoris oscula incurvato; & cantabo misericordias tuas in æternum & ultra. Amen.

22. Caiphas.



Illudebant ei, cædentes; & ve-
laverunt eum, & percutiebant
faciem ejus. *Lucæ. 22. v. 63.*

Affectus pii, & Proposita.

Romano Præsidi respondes, ô Christe;
Regnum meum non est de hoc Mundo. Ló-
 quere, ô Rex meus, & Deus meus, qui sub
 Sacramêto lates, ecquinam sunt candidati re-
 gni tui, & qui sunt hujus mundi? Mei, qui am-
 biunt latêre, nesciri, omnibus esse subjecti :
 illius sunt, qui per fas & nefas grassantur ad
 honores & officia, cunctisque ardent præesse.
 Mei sunt, qui credunt illud: *Beati pauperes spi-*
ritu! illius sunt, qui illud: ô beati divites! Mei:
 qui bona propria clargiuntur: illius, qui ra-
 piunt etiam aliena. Mei, qui in corde & ore
 habent; *quærite primùm Regnum Dei:* illius,
 qui clamant; *quærenda pecunia primùm est, vir-*
tus post nummos.

Quid insuper? Mei, qui castimoniam juxta
 statum suum rigidè servant? illius, qui vagâ
 libidine diffluunt. Mei, qui inimicos ex ani-
 mo diligunt: illius, qui etiam amicos odio
 habent. Mei, qui sobriè, piè, justè vivunt: il-
 lius, qui intemperanter, impiè, iniquè.

O Domine, adveniat mihi hoc Regnum
 tuum! hoc ingeminabo quotidie, Amen..

23. Pilatus.



Regnum meum non est de hoc
mundo. Joann. 18. v. 36.

Affec.

Affectus pii, & Proposita.

Quamdiù procabitur amorem meum Amor divinus, qui etiamnum in omni Arâ me quærit? quot ludos aget? quot mutabitur in personas?

Egressus ut sponsus; cucurrit ut gigas; jacevit ut infans; fugit ut exul; ambulavit ut peregrinus; obedivit ut subditus; ministravit ut servus.

Quid, quòd jejunavit ut pœnitens; luctatus ut miles; coronatus ut victor? Quid quòd medici partes inter ægros; magistri inter discipulos; patris inter filios explevit? Quid, quòd Samaritani, Pastoris, Vinitoris, Mercatoris, Regis, & plurium habitum induit? Et quas non actiones in mei gratiam egit in domibus ac plateis; in Templis ac Synagogis; in oppidis & urbibus; in montibus & vallibus; terrâ ac mari?

Nondum cessisti amori, ô cor durum? Sed dedit in pabulum; se obtulit in lytrum; se promisit in præmium. Sudavit ut agonizans; comprehensus ut latro; cæsus ut mancipium; velatus ut pseudo-propheta; accusatus ut seductor; habitus ut blasphemus; spreus hîc, & illusus ut stultus. Vicisti, ô Amor divine, vicisti; ecce cor meum, & omnem amorem, nunc & in æternum. Amen.

24. Herodes.



Sprevit illum Herodes cum
exercitu suo, & illudit indutum
veste albâ, & remisit ad Pilatum.

Lucæ 23. v. 11.

Affs

Affectus pii, & Proposita.

Quid hoc rei est? peccat iniquus, & punitur justus. Delinquit nocens, & plectitur innocens. Offendit impius, & damnatur pius. Quod perpetrat servus, exolvit Dominus: quod committit homo, sustinet Deus!

Nate Deo, quò tua decrescit Majestas, & increscit benignitas? Quò tua descendit humilitas, & ascendit charitas? Ego, ego iniquè egi, & tu pœnâ multaris? Ego facinus admisi, & tu subjiceris laniendræ? Mihi ista vincula, illa columna, illa tortorum sævitia, illa flagra, illa vulnorum multitudo debetur.

O Pater æterne, qui ut mihi vermiculo terræ parceres, non pepercisti unigenito tuo, te vehementer obtestor, per nimiam tuam, & ipsius charitatem, ut tandem sistam fluxum sanguinis istius, & in his & istis tuâ gratiâ desistam peccare. Egone ut virginum illud corpus, ut divinos illos artus lacerare, talia cogitando, loquendo, agendo pergam? Absit. Ad piacularem hanc Aram confugio, prius hîc moriturus, quàm amplius peccaturus, Amen.

25. Flagellatio.



Tunc ergò apprehendit Pilatus
JESUM, & flagellavit. Joã. 19. v. 1.

Affe-

Affectus pi, & Proposita.

O Mi JESU, qui hîc idem es in Templo, qui olim in Prætorio, si me totum debeo pro me facto, quid dabo pro resecto, & resecto hoc modo? Nec enim tam facilè resectus, quàm factus. Nam qui me semel, & dicendo tantum, fecisti, in reficiendo dixisti multa, fecisti mira, pertulisti dura; nec tantum dura, sed èt indigna. Heu quàm indigna vel in hoc mysterio coronationis!

Vilissimi enim homines plexo ex spinis acutissimis serto te coronant: coccineum tibi ferutum, instar purpuræ, in humeros conjiciunt: arundineum sceptrum dexteræ imponunt: curvato poplite Regem Judæorum ridiculè salutant: in te linguas exerunt, dentibus frendent, labiis loquuntur: te digiris notant, te conspuunt, te palmis cædunt.

Iterum, rogo, ô mi JESU, quid dabo pro me resecto, & resecto hoc modo? Firmiter statuo, uti debeo, omnem mei despicientiam, omnem injuriam, omnem ignominiam ferre tui amore toleranter, imò gratanter; qui etiam opto ex illis esse, qui gaudent pro nomine tuo contumeliam pati. Amen.



Induunt eum purpurâ, & im-
ponunt ei plectentes spineam
coronam: & coeperunt salutare
eum. *Marci. 15. v. 17.*

Affe-

Affectus pii, & Proposita.

HEi misero mihi ! quot telis saucia, quot vulneribus lacera, quot mortibus mortua est infelix anima mea ! Væ mihi peccatori, cum venerit dies judicii, dies iræ, calamitatis, & miseriæ ; cum aperiuntur libri conscientiarum ; cum dicetur de me : *Ecce homo & opera ejus !*

Quid faciam tunc, Domine Deus meus, cum cæli revelabunt iniquitatem meam, & adversum me terra consurget, & clamabit : *Crucifige, crucifige eum ?* Ecce nihil respondere potero ; sed demisso capite præ confusione coram te stabo trepidus, & confusus.

Itâne verò ! at enim necdum venit dies illa, dies iræ, dies magna, & amara valdè. Cognovi ego, & quidem in hac die meâ, quæ ad pacem mihi. Vivens, vivens confitebitur tibi Domine, sicut èt ego hodie. Confitebor adversum me injustitiam meam Domino, & tu remittes iniquitatem peccati mei. Peccavi, peccavi Domino ! & licet non audiam, quod semel audivit David : *Dominus transtulit peccatum tuum ;* audio millies : *Ecce Agnus Dei, ecce qui tollit peccata mundi.* Ecce homo. Amen. :

27. Ecce homo.



Dicit eis : Ecce homo. Clamabant dicentes: Crucifige, crucifige eum. *Joan. 19. v. 5. & 6.*

Affe-

Affectus pii, & Proposita.

DEus meus, qui ùt ubique divinitate, sic in hac sacrâ Æde mihi præsentissimus es tuâ humanitate, quî fit, ut quoties Crux aliqua sive hæc N; sive ista mihi submittitur; animo exhorream, voluntate averfer, verbis oblueter, manus humerósque subducam? Hic est sensus infirmitatis meæ.

Verùm exsurge anime, confortare, & in omni adversitate audi vocem Christi tui sibi oblatam crucem alloquentis :

Veni ! ô veni in amplexus meos, Crux ab æterno electa, æternis desideriis fota, infinitis amoribus concupîta, omnibus votis expectata ! Veni ! ô tandem veni sponsa mea, formosa mea, dilecta mea, ab origine mundi præparata, à Prophetis prædicta, à Patribus expetita, tot typis præsignata, tot sæculorum, tot Angelorum, tot hominum affectibus exoptata !

Veni in manus, in lacertos, in humeros meos, quam die noctûque memoriâ, intellectu, voluntate, ac toto corde complexus fui; te feram, à te ferar; in te vixi, in te moriar, pro salute tua, ô homo, quisquis es. Amen.

28. Bajulatio Crucis.



Bajulans sibi Crucem, exivit
in eum, qui dicitur Calvariae, lo-
cum. *Joan. 19. v. 17.*

Affectus pii, & Proposita.

ECce vir dolorum, novissimus virorum, filius hominis, filius Dei, vermis & non homo, opprobrium hominum, & abjectio plebis; ah humiliatus est nimis!

Quid superbis, ô homo; non homo, sed pulvis & cinis, quid superbis? Quid deliciaris, & gaudes? Dic putredini: pater meus es; & mater mea, & soror mea, vermibus. Risum reputa errorem, & gaudio dic: quid frustra deciperis?

Ecce Deus tuus circumvallatur ærumnis, & hominum pedibus conculcatur.

Et tu contra, ô homo, animi nimis pusilli, nimiûmque dejecti, dum foris pugnae, dum intus timores, quid percélleris, quid turbaris? Quid humi jaces? Ad te in terra adrêpit Dilectus tuus, & suavissimè insusurrat auribus tuis:

Noli timere, fili mi, ego de tuo fui trepidus, tu de meo esto securus; ego cécidi, ut tu stares; ego pondere peccatorum tuorum pressus fui, ut omni onere levaberis; ego sustuli peccata tua, noli timere. Hæc te, ô bone Jesu, in sacra Arâ jacentem, mihi dicere audio, & obedio, Amen,

29. Primus lapsus sub cruce.



In loco ad occasum vergente
 Christus in terram subsîdit. *A-*
drich. in descript. Jerus. n. 118.

Affectus pii, & Proposita.

O Tristissima Matrum, te adjurat anima mea, & qualis est, inquit, unigenitus tuus, qui occurrit tibi? & dicis illi: Unigenitus meus candidus, & rubicundus; sed non illo colore ad miraculum amabili, sed flebili supra omnem modum.

In horto enim Gethsemani candidus sudore, rubicundus cruore. Apud Caipham albo linteo oculis velatis: apud Annam genis alapa cruentatis.

In Aulâ Herodis indutus veste candenti: in Prætorio Pilati purpureâ. In ingressu ejusdem Prætorii toto corpore candidus; in egressu omnibus membris sanguinolentus. Et jam obviâ mihi factus, solâ innocentia est candidus; alioquin toto corpore purpuratus. Talis est unigenitus meus, ô Filia Jerusalem, & ipse est Dilectus tuus.

O Dilecte mi, qui etiam in Sacrificiis nostris inter alba lilia ac rubentes rosas; inter candidas hostias, ac vina rubra; inter alba purpureâque *Paramenta* conspiceris; da mihi de peccatis meis semper erubescere, & in sanguine Agni supra nivem dealbari, Amen.

30. Virginis Matris occurfus.



Prout traditum est, mœstissimo
 Filio mœstissima Mater occurrit.
Adrichom. ibid.

Affectus pii, & Proposita.

Domine mi Rex, in cruce ferendâ te sequi, tibi servire desidero. Siquidem te sequi dominari est, tibi servire regnare. Utinam ergò verè dicam: Servus ego, solum tuus, tu Dominus meus.

Non enim omnes ausi sint dicere, solum servus tuus ego sum: nam plures dominos habent. Venit *Ambitio*, & dicit Meus es; quia tori honoribus inhiant. Venit *Luxuria*, & dicit Meus es; quia in omnem voluptatem projecti. Venit *Avaritia*, & dicit Meus es; quia injusta lucra sectantur. Venit *Ira*, & dicit Meus es; quia non nisi vindictam spirant. Venit *Gula*, & dicit Meus es; quia epulantur quotidie splendidè. Veniunt omnia vitia, & singula dicunt, Meus es. Qui tot Dominos habent quàm multorum servi sunt; quot onera, quot juga, quot cruces tolerant, & heu quàm amaras, quàm graves!

O si ego tali emancipatus vitiorum servitute, accurram ad Aram tuam, mi Domine **JESU**, jugumque suave, & onus leve, id est, crucem tuam amplectar! Tu solus Dominus meus, & ego servus solum tuus. Amen,



Invenerunt hominem Cyrenæ-
um, nomine Simonem; hunc an-
gariaverunt, ut tolleret Crucem
ejus. *Matt. 27. v. 32.*

Affectus pii, & Proposita.

Quis olim clamavit; ostende nobis faciem tuam, & salvi erimus? Non tantum Domini facies mihi ostensa, sed data; numquid non in salutis certum pignus, atque eximium monumentum? Ita loquitur pia *Beronice*, & pergit loqui:

O mi Creator, ô mi Redemptor, quantum tibi debeo! Opus utriusque mirabile, & amabile; sed hujus magis. In primo enim opere me mihi dedisti, in secundo te; & ubi te dedisti, me mihi reddidisti. Data ergo & reddita, me pro me debeo, & bis debeo; quidnam jam tibi retribuam pro te? etsi me millies respondere possim, quid sum ego ad te? Minus quam guttula ad Oceanum, arenula ad universum, monumentum ad æternitatem. Perennem ego, beneficii istius memoriam servabo in sindone istâ.

O anima mea, quantum tu tuo Redemptori debes, qui sui memoriam non in mortuo linteo, sed vivâ Hostiâ reliquit; ubi non exanimis facies, sed corpus ejus integrum continetur! O Domine, quia solvendo non sum, te tibi reddo, & me millies tibi, Amen.



Hæc Matrona sanguinolentam
 Christi faciẽ findone suâ expref-
 fit, ut passim notum. *Adrichom. in*
descript. Hierus. n. 118.

TO PERPETUUM SACRIFICIUM

Affectus pii, & Proposita.

Patientissime Salvator, hîc iterum labens,
& humum cruentans, exhibes an imagi-
ginem, an medicinam peccatoris recidentis,
sêque pristino peccatorum tabo, ac sanguine
inquinantis? Amantissimè illi dicis: *Transiens
per te, vidi te conculcari in sanguine tuo, & dixi:
tibi cùm esses in sanguine tuo: Vive. Dixi, in-
quam, tibi, Vive. Expandi amictum meum super
te, & operui ignominiam tuam: & juravi tibi.
Vivit Dominus! quia nolo mortem peccato-
ris, sed magis ut convertatur & vivat.*

*Surgam ergò, & ibo ad Patrem meum, & di-
cam ei: Pater, peccavi in cœlum & coram te:
jam non sum dignus vocari filius tuus: fac me sic-
ut unum de mercenariis tuis!*

Et ecce inclinati sunt cœli, & melliflui fa-
cti sunt. Misericordiâ motus Deus meus de-
scendit ad Altare istud; venítque in occur-
sum meum, & osculatur me osculo oris sui.
Ad cor deinde loquitur, ac dicit mihi: Re-
missa sunt tibi peccata tua; jam amplius noli
peccare. Da mihi, Domine, hanc gratiam; sed
gratiam, efficacem. Amen.

33. Secundus lapsus ad portam.



Ad portam Judiciariam iterum
cadit. *Ad richom. ibid.*

Affectus pii, & Proposita.

VIs, Domine, me flere; jubes me flere pēcata mea, & meorum. Ad sacrum Altare, velut ad asylum, reus accurro, & ante illud toto corde prostratus exclamo:

Heu, heu, peccavi! *Tibi soli peccavi*, Deus meus, qui potentiam tuam infirmitate, sapientiam ignorantia, bonitatem malitia offendi. *Tibi soli*, qui ex indole tuā omnem iniquitatem odio habes: qui solus etiam nōsti pro gravitate suā æstimare peccatum. *Tibi soli*, quia leges tuas transgrediendo, tibi Legislatori præcipuè injurius fui: quia èt omnis proximorum læsio, te eorum ferit Auctorem. *Tibi soli*, qui peculiaribus favoribus prævexus, gratiisque cumulatus, pro tot bonis tot mala retribui. *Tibi soli*, quia animo, corpore, rebus externis iniquè egi. Quia insuper tu, Deus meus, & Accusator es, & Testis es, & Judex es: Accusator, quem toties & tam graviter læsi; Testis, in cujus oculis singula patravi; Judex omnium, etiam minimorum. Precor ignosce, qui solus potes peccatis ignoscere, peccatis mederi. Ignosce, ô Deus, Deus salutis meæ. Amen.

34. Filiæ Jerusalem flentes.



Filiæ Jerusalem, nolite flere
super me, sed super vos ipsas fle-
re, & super filios vestros. *Luc.. 23.*

Affectus pii, & Proposita.

EN cadit per quem cuncti stant; infirmatur
per quem omnes roborantur; in terrâ
Deus jacet, per quem homines eriguntur in
cœlum. O dulcedo mea, quot amaritudini-
bus; ô gaudium meum, quot lacrymis; ô sa-
nitas mea, quot vulneribus; ô vita mea, quot
mortibus obrueris! Prædigia sunt ista.

Non minora succedunt: incipiunt cœli in-
horrescere, terra contremiscere, Templi ve-
lum dividi, sepulcra coneuti, lapides conte-
ri, elementa omnia commoveri.

Quid tu peccator? tu prodigiorum omni-
um longè es maximum, qui in rerum omni-
um motu manes immorus; in communi ele-
mentorum sensu insensatus; in saxorum fra-
ctione non scinderis; in rerum animâ caren-
tium vitâ, es mortuo similis.

Si quid tamen in te vitæ melioris superest,
in terram prorue, Patrem cœlestem obtestare,
ut illum sanguinem humi fusum, eundemque,
qui in quotidiano Sacrificio ipsi offertur, au-
diat pro te benignè loquentem; ut totus mo-
vearis, & convertaris. Amen.

35. Ultimus lapsus..



Ad montem Calvariae sub Cru-
ce prosternitur. *Adrichom. in De-*
script. Hierus. n. 118.

Affectus pii, & Proposita.

Afflictæ animæ meæ loquitur Dilectus meus, & dicit; *Vide si est dolor sicut dolor meus*: ad funestum Calvariæ montem pro te adrêpens, gravi onustus trabe, coronâ spinâ confixus; post mille gemitus, post sanguineum sudorem, post amaras lacrymas, post plures lapsus, post cruentos gressus, pallorem mortis præ me ferens, extremum spiritum traho.

Vide si est dolor sicut dolor meus: post vitam innocenter transactam; post plurima patrata prodigia; post innumera in homines merita; nullo jure ac lege servatâ, in ipso ætatis flore damnatus sum: postque exhaustas crebris verberibus vires; post hiantia à capite ad imos pedes vulnera; in conspectu infinitæ multitudinis, mihi vestes crudeliter extrahuntur; vulnera fœdè innovantur; atque inter sceleratos morituro pro omni solatio fel offertur.

Vide si est dolor sicut dolor meus: mihi hoc idem idem ingeminat Dilectus meus, præsertim dum inops solatii sacram Mensam accedo; nec aliud solatium peto, Amen.

36. Extractio vestis, & fellis oblatio.



Hic tunica illius extracta. *Adrian. hom. ibid.*

Dederunt ei bibere vinum cum felle mixtum. *Matth. 27. v. 34.*

Affectu

Affectus pii, & Proposita.

Indica mihi; quem diligit anima mea, ubi pascas, ubi cubes in meridie? Hoc sæpenumerò rogas, dum ante meridiem domum illius invisis, ipsoque pascaris.

Indico ego tibi nomine ejus, quis sit accubitus illius, & simul indico quis sit tuus. Lectus ejus humi stratus est, in ignominia loco; tu lectum honoris & locum sublimem ambitiosè quæris. Accubitus ejus inter infames latrones; tuus inter honorifica, & statu tuo majora consortia. Jacet is inter opprobria, atque ludibria; tu stas inter gratulationes & plausus.

Rursum indico tibi, ubi cubet ille in meridie. Illius in paupertate, imò in nuditate cōmoratio; tua in luxu, & abūdantiâ vestium. Illius thalamus quàm durus in spinis est! tuus quàm mollis in plumis est! Illius manibus ac pedibus parantur crudeles clavi: tu manibus, pedibúsq; quid agis? Illius exhaustum vulneribus corpus nullâ quiete datâ projicitur in truncum Crucis; tu post exiguos labores omne solatium petis. Dic jam; non tantum volo nōsse accubitus Dilecti, sed et imitari. Amen.

37. Humi crucifixio..



Postquam venerunt in locum,
 qui dicitur Calvaria; ibi crucifi-
 xerunt eum. *Luc. 23. v. 33.*

Affectus pii, & Proposita.

Veni, accurre, Oriens, Occidens, Septentrio, Meridies. Ecce panditur Terra Sancta, beati pedes, venerandæ manus, benigna brachia, amabile pectus.

Eja quisquis es, humi te projice, & hunc adora, quia Deus est: hujus pedes osculare, quia Summus Pontifex est: hujus manus prehensa, quia Dominantium Dominus est: in brachia hujus invola, quia Pater est: in hujus pectus incumbe, quia Sponsus est.

Inspice vulnera pendentis, viscera misericordis, sanguinem morientis, pretium redimentis. Hæc quanta sint cogita, hæc in statêra tui cordis appende; ut totus tibi figatur in corde, qui pro te totus est affixus in Cruce.

Illud spectaculum quondam Christus uni Solymæ, & semel cruentus exhibuit; idem omnibus mortalibus, & locis innumeris quotidie exhibet incruentus. Sedebo igitur ad hos pedes cum Magdalena; palpabo has manus cum Thoma; pendebo sub his brachiis cum pio Latrone; recumbam in hoc pectore cum Joanne. Amen.

38. Suspendium in Cruce.



'Stabat juxta Crucem J E S U
Mater ejus. *Joan. 19. v. 25.*

Affectus pii, & Proposita.

O Myrrhæ fasciculum venerabilem, myrrhæ primæ, myrrhæ probatissimæ! Ad expiationem peccatorum, quibus me abundare; & ad cumulum meritorum, quæ mihi deesse cognosco, hunc ego fasciculum inter brachia mea excipiam, & inter ubera collocabo, collectum ex omnibus anxietatibus, amaritudinibus, conviciis, sputis, colaphis, subsannationibus, exprobrationibus, flagellis, spinis, clavis, horumque pluribus, quæ Dominus meus mei amore toleravit.

Hunc myrrhæ tam charum fasciculum, omnis Crucifixi amator, de principatu tui pectoris, nec ad horam, patiaris avelli. Amara illa omnia, quæ pro te ille perpeffus, alto animo retine, & assiduâ meditatione perpende. Utinam in meditatione ista exardescat ignis doloris, ignis amoris; & verè dicas: *O beatum incendium, amare Dei filium*, & Dei filio condolere!

Tum verò vel maximè exæstua, & totus accendere, cum divinus Amor, id est, Dominus ille tuus ex Arâ ad te convolat, labiis insidet, cor occupat, animam totam adurit. Amen.

39. Exceptio in sinum Matris.



E Cruce depositus gremio materno excipitur. Etiamnum is locus ostenditur. *Ad richom. in de-script. Hierus. n. 255.*

Affe-

Affectus pii, & Proposita.

Aspicio hoc sacrum Depositum priusquam sepulcro condatur, idémque redivivum, antequam ex Altari ad me deferatur, & exclamo : Ecce quomodò amavit me ! Dedit genas vellentibus ; faciem conspuentibus ; capillos extrahentibus ; corpus percutientibus ; caput coronantibus ; humeros crucem imponentibus ; manus pedésque perforantibus.

Ecce quomodò amavit me ! Quando unicâ guttâ sudoris , unicâ lacrymulâ , gressu, gemitu, ictu oculi, voluntatis actu me redimere potuisset ; ah ! quot guttas sanguinis, quot lacrymas, gressus, gemitus, horas, dies, annos impendit !

Ecce quomodò amavit me ! Omne passionis tempus vocavit *horam* ; Oceanum æruminarum vocavit *calicem* ; paratissimus pro me, non tantùm semel, sed millicies in horro ; jacêre, pro tribunalibus stare, per vias râpi , in cruce pendêre.

Et cui tuum tu impendis amorem ? An huic rei N ? an illi N ? vel isti N ? Væ mihi si amplius fecero ! Te solum, ô Amator mi, amabo te solum. Amen.

40. Sepultura.



Posuit eum in monumento,
quod excisum de petra. *Marc. 15.*
vers. 46.

O Amator JESU, perpetuò pro-
 te Sacrificati, en quanta op-
 portunitas honoris & amoris e-
 jus propagandi, non modò in fa-
 milia tua, sed in Carceribus; No-
 focomiis, Cœnobiis; in Navibus,
 Scholis pauperum, Oppidis: de-
 nique inter Dominos Pastores,
 Confessores, Catechistas, &c.

AD MAIOREM DEI
 GLORIAM.



